



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

4. Kalenderwoche – ab 24.Januar 2009

Dähr Schdurz in dähn Gellor

Kenn Se dähn, wo sisch zwee Freinde drefn dun? Nee, isch meene jedzde nisch dähn, wo dann dähr eene zum annorn sachn dud, dassor beim Arzd gewähsn is... nee, dähn meen isch jedzde nisch. Ooch nisch dähn, wo dann der Freind frachn dud, wie denne die Frau ausgesähn hat, die da naggsch im Kleedorschrank war... nee, isch meene jedzde dähn, wo dähr Freind dähn annorn frachn dud, wies denne dähr Ehefrau gehn dud. Dähn kenn Se nisch? Gud!

Also, da dud also dähr eene sein Freind frachn, wies denne dor Ehefrau gehn däde. Na, dähr dud das villeischd frachn, weilor die Frau von seim Freind lange nisch gesähn hadde. Der Freind dud nu jednfalls sachn, das seine Frau im Krankenhaus lieschd. Mid gebrochne Beene, Ribbn, Arme un Zunge.

"Alles gebrochn?" - frachd dähr Freind besorschd.

"Ja, alles!" - dud dähr annre beschdädischn.

Da sachd dähr Freind: "De Zunge kammor sisch abor nisch breschn. Heeschdens abbeißen."

"Naja", sachd da dähr annre widdor - "so odor so, jednfalls kann se nisch mähr redn. "

Da sachd der Freind, dass das ooch sei Gudes ham kennde, un will nu abor genau wissn wies bassierd is. Zweggs geleschendlischor Nachahmung villeischd.

Da dud nu der annre erzähln: "Mir wolldn uns e scheenes Ahmdbrod machn - mid Bradgardoffln un

Buleddn. Un da isse also weschn de Gardoffeln in Gellor nunnorgegang. Abor se hadde widdor ihre aldn Hausschuhe an, wose drinne immor so rudschn dud. Un wo isch dann vom Gellor hähr hab was rumbln un bumbln geheerd... un dann e Gejammer... da habsch nachgeguggd, was bassierd is."

"Un was war bassierd?" frachd nu der Freind, dähr ooch gerne Bradgardoffln mid Buleddn essn dad. Da had dähr annre weidorerzähld: "Na, wie isch in dähn Gellor nunnorgugge, da lieschd die undn an dor Drebbe, offm Rigggn, Beene in de Lufd... middn in de Gardoffln... un konnde sisch nisch mähr beweeschn."

"Un was hasde da gemachd?" - wollde nu dähr Freind midfühlend wissn.

Da sachd dähr annre: "Da habsch mir Nudeln gemachd."

Da frachd dähr Freind: "Mid odor ohne Domadnsoße?"

Nee, hä? Dähr is doch eschd ludsich. Isch du misch bloß frachn, was isch mir gemachd hamm däde, wenn meine Gudste... also, ma angenomm... Nudeln sinn nähmlisch nisch direggd meine Weld. Isch... na, villeischd hädtsch mir eene Biggse mid Linsnsubbe offgemachd. Un de Buleddn neingeschnibld. Die wern ja bei eim Schdurz in dähn Gellor nisch in Midleidnschafd gezochn. Buleddn wern schließlich im Giehlschrank offbewahrd, nisch im Gellor! Ja, beschdimmd hädtsch mir Linsn gemachd. Un Sie?

Eduard Sachsenmeyer